

agus labhair an Tighearna re Maois.

10 Agus chunnaic an sluagh uile am meall neoil 'na sheasamh aig dorus a' phàilliun: agus dh'èirich an sluagh uile suas, agus rinn iad aoradh, gach duine ann an dorus a bhùtha.

11 Agus labhair an Tighearna re Maois aghaidh re h-aghaidh, mar a labhras duine r'a charaid. Agus phill e ris do'n champa; ach cha deachaidh a sheirbhiseach Iosua, mac Nun, duine òg, a mach as a' phàilliun.

12 Agus thubhairt Maois ris an Tighearna, Feuch, *ata* thu 'g ràdh rium, Thoir suas an sluagh fo: agus cha d'thug thu fios domh cò chuireas tu maille rium. Gidheadh thubhairt thu, 'S aithne dhomh thu air t'ainm, agus mar an ceudna fhuair thu deagh-ghean a'm' shùilibh<sup>a</sup>.

13 Anis uime sin, guidheam ort, ma fhuair mi deagh-ghean a'd' shùilibh, nochd dhomh do shlighe, a chum as gu'm bi aithne agam ort, agus gu'm faigh mi deagh-ghean a'd' shùilibh, agus meas<sup>b</sup> gur e 'n cinneach fo do shluagh-sa.

14 Agus thubhairt e, Théid mo làthaireachd *leat*, agus bheir mi fois dhuit.

15 Agus thubhairt e ris, Mur d'théid do làthaireachd *maille ruinn*, na d'thoir suas sinn a fo:

16 Oir ciod e leis an aithnì-chear ann an fo gu'n d'fhuair mise agus do shluagh deagh-ghean a'd' shùilibh? Nach ann le d' dhol maille ruinn? Mar fo

dealaichear sinn, mise agus do shluagh, o gach uile shluagh a *ta* air aghaidh na talmhainn.

17 Agus thubhairt an Tighearna re Maois, An ni fo mar an ceudna a thubhairt thu, ni mise; oir fhuair thu deagh-ghean a'm' shùilibh, agus is aithne dhomh thu air t'ainm.

18 Agus thubhairt e san, Foillsich dhomh, guidheam ort, do ghloir.

19 Agus thubhairt e, Bheir mi air mo mhaitheas uile dol seach a'd' làthair<sup>d</sup>, agus gairmidh mi ainm an TIGHEARN a'd' fhianuis; agus bithidh mi gràsmhor dha-san d'am bi mi gràsmhor, agus nochdaidh mi tròcair dha-san d'an nochd mi tròcair.

20 Agus thubhairt e, Cha'n fheud thu m'aghaidhs' fhaicinn; oir cha'n fhaic duine air bith mise, agus e beo<sup>e</sup>.

21 Agus thubhairt an Tighearna, Feuch, *tha* àite làimh rium, agus seasaidh tusa air carraig<sup>f</sup>:

22 Agus an uair a bhios mo ghloir a' dol seachad, 'an sin cuiridh mi thu ann an sgoltadh do'n charraig, agus còmhdaichidh mi le m' làimh thu gus an d'théid mi seachad.

23 Agus bheir mi air falbh mo làmh, agus chi thu mo chùlaobh; ach cha'n fhaicear m'aghaidh.

## C A I B. XXXIV.

**A**GUS thubhairt an Tighearna re Maois, Snaidh dhuit féin dà chlàr chloiche cofmhuil ris na ceud *chlàir*; agus fgrìobhaidh

<sup>a</sup> taitneachd a'm' shealladh. <sup>b</sup> faic. *Eabh.* <sup>c</sup> m'aghaidh *Eabh.* <sup>d</sup> ga-thail seach romhad. <sup>e</sup> cha'n urrain duin' air bith mise fhaicinn, agus a bhi bho. <sup>f</sup> air a' chreig *sin*.